


嘉儀

穀鄭

堂堂

集文



儀 鄭 堂 文

孔 廣 森 撰
阮 元 敘 錄

編主五雲王

編初成集書叢

種一他其及文堂鄭儀

中華民國二十八年十二月初版

發行人

王雲五
長沙南正路

印刷所

商務印書館

發行所

商務印書館
各埠

(本書校對者
張嘯師天竹)

G 一六九五上

密

叢書集成

初編

主編者
王雲五

商務印書館發行

儀鄭堂文

本館據文選樓叢
書本排印初編各
叢書僅有此本

儀鄭堂文卷一

曲阜孔廣森撰 清 儀徵阮 元敍錄

孔廣森字衆仲號臯軒孔子七十代孫居曲阜乾隆辛卯進士官翰林院檢討聰穎持達曠代逸才經史小學沈覽妙解所學在大戴禮記公羊春秋尤善屬文沈約蕭統可與共論錄儀鄭堂文二卷

武成頌

臣聞在天垂象金精耀參伐之旗惟聖憲時雷豫習行師之繇軒皇御籙先修赤水之征唐后垂裳必輯青邱之暴亦有周宣薄伐近在太原殷武哀師不踰荆楚而三年有賞易已象其成功千里來歸詩尙歌其永久方之今日靡得而言焉欽惟皇帝陛下秉武三曾抗稜八表銀鑾拓地金虎開圖建木以西鑿空萬里長榆而北列戡千城象載形方規矩上黃麟之瑞銅街闢邸呼韓刑白馬之盟雲呂十旬記里之車合軌鞮胥九譯萁幣之史同文幽遐畢屆其梯杭泰遠咸歸乎幃幃而禹功不到西流自絕於朝宗梟性難馴東徙仍迷於革響乃有兩金川者鼉令游魂犬獠餘孽化殊天外犯熒塞以稽誅俗遠華中比夜郎而自大粵在卯辰之歲曾興戊己之師宥以投戈許其載木恩寬釁社未封武觀之鯨鯢榮假分符俾禦危山之魑魅而乃獍心反噬鳴義矯虔不格兩階之干自投一面之網促浸土司索諾木負阻窺覲憑遐翻覆狝蛇薦食屢及於鄰疆蠻觸尋爭漸連於內地趨拉土司僧格桑蚤與駝比熊本羈生外順內達每

泄駒支之語。高巢陞制。擅詢句町之仇。議者猶以天險不可升。鞭長莫能及。轡野修戎之日。亦緩前禽。龕山合玉之年。非無後至。文臣臆決。請罷守於珠厓。哲后沈幾。命洗兵於玉壘。蓋以王鈇威遠。睽矢勝殘。保大定功。有征無戰。三辰所照。靡亭毒而或遺。九伐無私。孰孤離而必討。於是發軍城郭。簡銳微盧。闔虎朝鋪。人問沈黎之罪。跼鵞夜渡。衆爭敵愾之功。師出一年。月聞三捷。僧格桑棄地而遁。小金川全境以降。然而虎負嵎間。困猶思鬪。鷹棲韞土。飽卽背人。此則因壘之師。所以勞其再駕。渡瀘之役。必將示以七擒者也。聖天子昃晷思賢。綸書策將。重鑿門之命。寄專閫之司。爰以阿桂爲定西將軍。營平受律。羌罕料其成禽。裴相視師。淮蔡聞而悸魄。若乃隆衝葦葦。旗鼓堂。朔簪燕弧。韓章鵠幟。索倫蹶張之卒。吉林超距之徒。八旗試弁之倫。六郡良家之子。輶車百雉。挾風隼以駢驅。箬矢三鏃。怯雲鵬而墜影。庚鈴制勝。九天九地之兵。甲帳懸符。四正四奇之陣。再平美諾。一掃荒陬。紮彼妻孥。降其部落。月氏已死。漆函傳飲器之頭。徵側爲俘。驛騎致蠻銅之鼓。惟是逆酋索諾木。連鷄失執。知必及於天誅。鋌鹿已窮。猶自恃其地利。環山列柵。背水施礮。奮螳臂以當輪。網螫絲而結衛。羊腸西轉。自回九折之谿。牛尾東來。未鑿五丁之路。雪凝陰阪。經炎夏而不消。日遠陽關。積漏天而生瘴。我師長馳渠答。直冒槍雷。指揮則屋瓦皆飛。叱咤則九泥失險。危城折箸。械九設而九攻。壯士乘墉。布再懸而再斷。文淵負羽。獨進壺頭。士載裹氈。親踰劍閣。遂以去年八月十五日。破勒烏園。戈矛照月。鸛鵝之隊彌雄。旌旆生風。鴨鶩之聲盡亂。斯時也。天子方講藝螭坳。修文虎觀。咨儒官於劉向。遣謁者於陳農。羽檄星馳。疊下五申之令。銅籤夜警。仍披二酉之編。豈非天

賈聰明。聖兼文武者。與刮耳崖者。軍道之衿喉。賊居之窟穴。地稱巖邑。山挺石林。孝子望而旋車。元侯行而束馬。六師併力。五尺略通。道古攻其東南。亞夫備其西北。九重籌筆。乃懸御於氏。羌三帥宣猷。更分功於卻。范狼弧氣肅。曠弩先飛。箕壁星高。火輜具舉。進攻黃寺。震讐其祆神。屢獲殃徒。係纍其母妹。我氣方銳。破竹無頓刃之勞。彼力益殫。竅木有丁衝之急。幕危燕散。鼎沸魚驚。方陳縛主之求。始請吠堯之罪。今年二月四日。索諾木兄弟就禽。治罔脅從。誅無填服。金城上奏。七朝達於長安。都護飛書。五日聞其吉語。葱靈執訊。露板慶成。比赤囊報至之時。當翠蓋巡行之地。助過獲嘉之改縣。事同聞喜之名鄉。皇上展謁兩陵。奏膚七廟。靈臺上祭。卽陳丹水之功。畢郢升祠。自兆素鱗之慶。善歸聖母。敬上徽音。奉慈輦以豫游。遵翕河而哀對。杏花菖葉。兼省春耕。茆水芹宮。式迎秋駕。太山玉策。探瑞算之無疆。魯殿金絲。告武成之有截。旣而赤融效職。朱陸移躔。襄城迴訪道之輿。巴徼振凱旋之旅。條侯之屯細柳。擐甲冑以來朝。耿弇之在臨淄。降乘輿而親勞。然後有事宗社。大獻馘俘。秋官請纓。夏卿執鉞。戒彼費留之賞。廣我通徹之封。柅轡青圭。來召公於漢澣。葱珩赤芾。拜方叔於新田。李霍助名。咸開東第。鄂襄毛髮。並繪南宮。雅奏勤歸。軍容譁卸。玉關偃革。紫塞銷兵。鶴膝羊頭。仍入蘭錡之庫。龍文驥子。散歸仙掌之山。雖復金母環來。樊侯鼎出。冠軍絕幕。刻石字於狼胥。博望浮槎。控河源於牛渚。未若殊鄰稟朔。荒裔占風。寶布時供。賸錢歲納。冉駹邛笮。交輸流沫之珍奇。僭佞侏儻。疊聽提官之謳詠。是則豐京王會。列三臺於陰羽之中。洛水明堂。朝九采於應門之外。不假銜鉤之后。載十一征。豈惟通譯之邊。餘四萬里。赫赫乎一人之聲靈。煌煌乎千

古之盛事。綜茲輕緯。可咸五而登三。勒之簡編。將襲六而爲七者已。臣忝列鵷行。粗窺豹管。聞西戎之者。定均慶於並天。念東土之瞻光。感縈於私渥。懷深睇尹。語罄揄揚。雖不工於文章。尙慚朱鷺饒歌之作。庶以載夫功德。亦附白狼槃木之餘。謹獻頌曰。

於鑠上聖。奄有下矩。象寄柔逋。龜沙卽敍。奇幹善芳。肅愼文啓。東漸日飢。西底月戶。孰敢不庭。膏我齊斧。九姓內藩。廿年外侮。蠱離大邦。侵擾西土。邊吏上言。宸居赫怒。秉節禍牙。發璋徵琥。桓桓定西。國之彊禦。總領戎旂。師干甄部。青叟從行。白徒束伍。有猷斯鷹。其矯如虎。署道披圖。指形聚黍。裂彼右肩。斷其脣輔。爾險何依。爾遠何怙。縫革衝礪。巧籠飛炬。破易撥醴。動若摧腐。羌豪帥醜。刮耳是聚。井底困蛙。穴中竄鼠。五兩振威。重山夷阻。季母旣禽。精夫亦虜。戎庭分犁。苗人安撫。紅旂之捷。奏行在所。讓德於天。告功於祖。大武承謨。達孝續緒。吉蠲上陵。甘露有涓。瓊冊述徽。璇宮秩祐。安輦輦輿。洪臚清籟。殷賁協周。祈沈觀滬。水若恬流。登祇順扈。輯瑞岱宗。陳風嫺渚。淑問西庠。祭菜東魯。展案崇今。上儀稽古。飲至策勛。愷歌率舞。青壇三陟。緹帷重組。嘉乃戰多。慰我勞苦。昔奏采薇。今歌杖杜。文相帷幄。武人樽俎。榮以旂常。申之袞黼。形繪雲臺。聲垂銅柱。天語龍轡。雲章鳳舉。紀跡峻崖。勒崇膠序。詞揜岐陽。典高岫嶺。乃闢南端。載升展寧。寮采師師。徹行楚楚。右列作士。左班祈父。鱣奏靈鼗。鯨鏗猛虬。僑榮染鐔。尸禺疊鼓。兩觀旣誅。重巽式溥。復稅農疇。緩租國庾。化洽橫舍。仁流圓圉。廣青衿員。赦赭衣侶。威肅春霆。澤沛夏雨。九塞清塵。四民安堵。唐平蜀道。周省淮浦。尙誦昌黎。猶詩吉甫。以今準往。瑣瑣何數。天錫皇帝。神聖文武。於千萬年。爲億兆主。

上座主桐城姚大夫書

五月十七日。領到惠製儀鄭堂記一首。如來鄴騎。方窮寶訣之繩。恐效津龍。遽化豐城之鏢。雕陵顧字。渙水騰文。歡喜奉持。回還誦讀。去天三尺。未喻聲高。繞極一句。定知塵起。伏惟夫子大人。立言不朽。下筆爲經。受書於河洛之間。講學於濂伊之表。斟酌體要。二百年吏部之文。含吐風神。六一翁廬陵之集。乃若子山宮體。丁廩小文。固有類於俳優。尙恥爲於執戟。而廣森藉承談末。經示端倪。以爲湘水波瀾。稱言絕妙。春旗楊柳。無字可刪。旣舉斯隅。自覽其切。遂得粗知偶事。強附駢聲。它日韓陵片石。免作驢鳴。樊南一編。積成獼祭。誰開間介。卽被雕朽耳矣。蝸角荒廬。蛇年草創。東鄰縈映。顧慚拙宦之居。北市囂塵。差遠小人之宅。然而方纔布武。廣不由句。在陸疑舟。有肉似甕。雖開府小園。何嘗無賦。而長卿陋室。未必堪銘。豈意金壺副墨。石室餘縑。錫以題辭。光其棗稅。入長公別集。彌榮三槐之堂。乞退之一言。便擬雙松之舍。竊惟校漢儒林。東京尙已。稱鄉先達。北海褒然。是以小已忘涯。高山仰止。低徊哲範。若見之牆。撫擬賢容。欲圖之壁。重聞命焉。曰姑舍是。賢者識大。不當囿以專家。古之離經。非徒尋夫章句。許君謹案。何掾膏肓。雜問之志。六藝之論。詎要道之微言。祇通人之鄙事。若廣森者。私淑於趙商張逸之間。激揚於賈釋孫評之後。旁要夕桀。僅取多能。觝字曲聲。惟資小學。上士勤行之道。本未朝聞。羣經淆亂之言。何曾晚定。若其溯高密之徽風。追不其之逸躅。足使冀州畔援。折敬伊人。應劭宏通。願爲弟子。二千石青綬。式駟馬以旌門。百萬衆黃巾。望單車而解甲。世無孔子。當亦游夏者流。第之宋儒。不在張程以下。是則慕蘭相如之名。其去

猶遠。讀臺孝威之傳。此志終狂。苟將業彼箋疏。呻其佔畢。而謂著書通德。訓詁傳於此名。寫定禮堂。祝史尊其陳數。匪直鄭公之學。謬爲聖證。詆譏抑幾董傳之徒。乃有步舒惑陋。與因荷言提。歸諸盍各。負牆無地。迪牖何年。起安石於東山。志今益遠。望義和於南陸。心與俱馳。

上父執梁山舟侍講札

仰紆椽筆。俯賜楹題。遙蒙七字之褒。愧荷百朋之錫。廣森問奇有志。驚駕十回。執轡無因。龍門萬丈。輒用裝之玳瑁。軸以琉璃。馳賞墨林。重齊紈之價。懸輝聖壁。知蜀素之珍。謹謝。

與同年林編脩澍蕃札

承惠永樂大典護葉紙。故府珍收。前朝舊製。比澄心於宋紙。殊鏡面於吳箋。杜武庫之蜜香。初分帝賜。張茂先之側理。遂惠臣家。染墨匪輕。捧翰知重。謹謝。

謝人代撰詩札

足下才高倚馬。價重雕龍。范岫之管一雙。江淹之錦數尺。僕略解蕪吟。其如拙速。自觀藻咏。兼切欽遲。輒復乞餘潤於懸河。分末光於鑿壁。孔璋多事。亦代裁書。安國少文。居然賦几。所幸謬同瓊瑛。竊向秀之縹緗。猶恐易辨淄澠。恍陸機之杼軸。謹謝。

戴氏遺書總序

東原先生姓戴氏。諱震。徽州休寧人也。學於古訓。言行可法。以薦爲四庫全書纂修。賜官庶吉士。春秋五

十有五。乾隆丁酉五月二十七日疾卒。凡所著文章經義若干卷。叔父農部公先生之昏因也。繼而刊之。廣森嘗聞先生緒論。又感先生崇闡漢儒而不終其志以歿。乃爲序曰。

緬惟樂遊講藝。訪太傅於石渠。元日談經。坐侍中於重席。時則玉羊旣遠。金虎初開。著學官者凡十四家。說稽古者成數萬字。至若五是六沴之徵。定君陽武。三科七缺之法。繫獄淮南。士苟通經。皆能致用。蓋原其授受。本屬參商。敍其世年。未睽昌闕。是以祖之前師。沿之後葉。北方戎馬。不能屏視月之儒。南國浮屠。不能改經天之義。夫學有優劣者。時也。經有顯晦者。數也。五君晚出。非漢博士之傳。千禩相仍。廢鄭司農之註。縱橫異說。別創先天。顛倒聖文。悉更後定。特以腐儒炫視。易謬驪黃。末士明經。原求青紫。但遵甲令。粗知帖括之詞。疇克庚言。紹彼先民之作。敏而好學。信而好古。惟於戴君見之。已君以梅姚售僞。孔蔡謬悠。妄云壁下之書。猥有杭頭之字。古文一卷。祇出西州。小序百篇。舊名北斗。正謨攝詰。歷黃序而僅存。月采豐刑。遘赤眉而已燼。乃或誤援伊訓。滋元年正月之疑。強執周官。推五服一朝之解。譬之爭年鄭市。本自兩非。議瓜驪山。良無一是。是用翦除假託。折衷羣淆。步驟五三。錄目四七。爲尙書義考。未成。成堯典一卷。又以要聞五際。尙論四家。毛傳孤行。是觴源於牟妙。鄭箋破字。每毫采於轅嬰。莫不假聲注文。以意逆志。誠古訓之所式。多識之所資也。雖其篇冠以序。擇焉不精。或云託諸西河。或云造諸東海。然嗣矜貽玖。何必欲色之音。交扈羅鴛。實爲陳古之刺。爲毛鄭詩考正四卷。別爲詩補傳。未成。成周南召南二卷。君之入書局也。西京客史。夙善徐生。東觀中文。遂分淹禮。乃取忠甫識誤。德明釋文。殫求豕亥之差。期復鴻都。

之舊互相參檢。頗有整齊。削康成長衍之條。退喪服。廁經之傳。爲儀禮正誤一卷。鄭斤粵縛之篇。備遺事職。穹蓋星弓之教。首列巾車。九經九緯。營國有方。五溝五涂。奠水有則。尋筵旣度。遂知洛邑之朝。圭桷未縣。孰辨營邱之夕。以至肆懸舞甬。五等琮璜。槐里樽空。椎成劍沒。大夫嫁女之器。未必皆眞。單于賄漢之銘。何嘗盡僞。譏盜之所畫績。梁鼎之所更釐。不可參稽。將無競爽。爲考工記圖二卷。古者冕服以祭。弁服以朝。祭則衣純。朝則以布。芾形連帶。制異於直方。屨色從裳。次分於績繡。周壇饗帝。大裘降繁。露之華。魯禘嫌王。旒璫飾丹雘之祝。等威昭焉。文質備焉。道學起而儒林衰。性理興而曲臺絕。齊秦委武。莫識稱名。殷夏園章。焉能考據。溯增冰於積水。示祭海於先河。爲學禮篇一卷。冠其文集十卷之首。且夫一陰一陽之爲道。見仁見知之爲性。通於六籍之爲學。辨於萬事之爲理。謂理具靈臺。則師智者得。謂學遺象罔。則悟寂者先。豈有略窺語錄。便詡知天。解斥陽明。卽稱希聖。信洛黨之盡善。疑孟氏之未醇。其說空空。其見小小。蓋繹鄭君生質之訓。誦周雅教本之箋。所謂受中自天。秉彝攸好。孔提可按。漢學非譌。爲原善一卷。孟子字義疏證三卷。大學中庸補註各一卷。君之學術。此其大端歟。景純有云。爾雅者。九流之津涉。六韜之鈐鍵。虎闌小學。未束髮而知書。豹鼠奇編。不下席而觀古。故辨言之樂。對於三朝。首基之文。問於五始。至於殊方別語。絕代離詞。皆轉註之指歸。亦凡將之墜緒。爲爾雅文字考十卷。方言考證十三卷。書教有六。最夥諧聲。叔重無雙。惟傳解字。若乃部分平仄。母別見溪。官家恨狹。羊戎之所自爲。天子聖哲。梁武之所不信。古人韻緩。止屬椎輪。後世音繁。實精引墨。君審其清濁。導以源流。旁通反紐。發周沈之舊聞。上協

詩騷探顧江之新義爲聲韻考四卷聲類表十卷

先生文集·尚有轉語二十章及六書論三卷自序·此二種遺稿未見

於是辨韻之餘留觀百

氏研音之下雅愛三閭以爲娥臺訪女近窈窕之遺聲湘水寥芳續榛苓之逸響叔師註而未詳辨招附而不可核之漢志名從主人爲屈原賦注四卷自疇人分散鄒大失居九章中落昧商高積矩之言八線西來竊師氏旁要之算而耳聽下士穴見小儒不知五五之開方輒薄九九之賤技哨壺斗五律管徑三元晦以之存疑季通以之強說未知紀步何能讀宅柳之經未曉倨句何能治上輿之記爲九章補圖一卷原象一卷古歷考二卷歷問二卷昔趙商難禮先求五服之方景伯受詩卽涉七州之地君山川能說郡縣成圖酈元故籍證其繇褫崑渤今流條其絡脈爲戴氏水經註四十卷水地記一卷直隸河渠書六十四卷嗚呼君之著書可謂博矣君之見道可謂深矣向使壽之以年行其所志下安輪於郡尉授梯几於鴻臚雍宮未建命曹褒以定儀大子將成詔宋登而持節雖復辨卿訟闕公羊未必能明子駿移書逸禮難其置立而太山郡將北面稱師上蔡通侯西行受業則何湯旣貴輜車方賜於五更君上從遊錄牒庶多於萬計豈謂陰堂告祝圓石鐫名一經之寫定無年三歲之瓊瑰已夢清明卷佚長封下馬之陵通德人亡不待嗟蛇之歲然而太元覆甌終遇桓譚都養陳謨彌尊伏勝鄭鄉絕學倘千百載而重興戴氏遺書於十三經其有補悲懷逝者延佇將來

王氏醫治序

語曰若金在鎔惟冶者之所鑄貢云三品見情之列居前國有六工築氏之齊執下所以激沈清濁甄類

苦良。蓋吏之有課。史之有評。詩之有品。書之有職。方諸大治。厥義維鈞。則我更生。王君於是。有醫治之作。言夫鵲居既遠。鯢壽斯希。四節潛乖於冥造之初。六鑿相攘於微眇之後。雖復桃弧春射。天札猶多。荆盾秋毆。孰噓詎少。由是權輿百艸。赭鞭奉軒后之威。消息三停。素女發明堂之訣。入靈蘭之室。卽受奇胫。過長桑之舍。方聞禁要。冰臺三歲。鐃刺九名。乞錄籍於開陽。駐顏暉於連石。是以刑臣西上。降綸玉而求方。世子南征。解葦瑜而採藥。然而青囊委蛻。卷軼丙丁。公晏淪湮。經虛甲乙。自餘楚賦。鮮稱九折之良。不遇涪翁。孰曉六微之技。昔之視垣一方。見心六孔。長兄察色。仲子覘豪。裏紺知生。茲青知劇。龍門濁浸。回通關蟄之經。駢穴澄源。內合支蘭之藏。豈有循雞轉急。握虎翻舒。狀榆落而非真。期韭英而罔驗。帷中十指。曾迷婦寺之殊。壺子三淵。不辨權衡之氣。斯診脈者失也。遙傳帝問。僅丸雀於茅蒐。閒探軍謠。拯河魚於麥鞠。黃環赤箭。未錄桐君。漆葉青黏。略存樊氏。而或倍偏枯之餌。倖瞑眩之瘳。壹蛄毋以爲君。謂烏頭而可帝。必致以熱益熱。以寒增寒。心識分銖。非其能事。治蠲湯液。去之愈遠。斯處劑者失也。將謂上商少羽。會於六六之紀。欽徵加宮。判於五五之性。則七元詭歷。孰司天其可憑。八谿蘊深。譬迎雲而未極。相如瘡病。非皆斲作之時。杵臼痲店。何必容平之月。玉機旦讀。祗亦空文。金匱年荒。已爲陳迹。循環齡素。石溜仍疎。俯仰鉛黃。膠飴莫效。斯泥古者失也。晚有完素。嗣以義烏。損陽益陰。墜離升坎。廢溫中之味。先寫下之法。五分之熨。奚施百灌之寒。垂殆嗟乎。春燠者生之徒。秋淒者殺之令。故楊泉有言。道家尙冷。醫家尙溫。今輒反之。使升明火化。絕於君主之官。洒淅陰淫。客於奇恆之府。懸方肘後。安望延齡。納斧胸中。將無伐

性斯見偏者失也。王君仁者愛人，學焉先覺，自垂絳轡，厭窺中古之書，早悟華琳，似飲上池之水。若乃萬金良藥，九部奇經，審咬咀於毫釐，候樞闔於尺寸，經過濟北，便識才人，留滯交南，倘逢仙令，廣峨嵋之術，祕欲託嬰巢，拾長沙之仆漏，宣明孫絡，徵其治案，已驚掛廐之車，推其神工，應寤援熊之夢，且復濡烟橘井，比事芝函，岐區復逆之詞，和緩春秋之策，意專信史之傳，俞矯寓言之篇，以及歲稽四失，周官之所殿，月爲千軸，梁皇之所嗤，靡弗收羅，於是法戒品題，備適流別，洞該者矣，猶恐末士膚受，攻乎異端，襲高陽之紕紛，昧河閒之結滯，死如可作，疑懷躍冶之鳴，生不同時，尙有載金之悔，是則辯囿何窮，狂泉不竭，存其正論，質諸古人。

張舍人損熱河集序

昔嚴夫子有言，經有五涉，其四州有九游，其八猶以聽覽所及，不踰白阜之封，吟翰所被，未罄黃坤之域，亦有落梅驄馬，迢遙隴上之章，低草牛羊，敕勒軍中之句，鏡歌白鼻，樂府黃鸝，過青冢而怨琵琶，弭白檀而思鼙鼓，莫不叩響風疏，聯辭雲委，然而悲筵九月，寒草前衰，橫笛三臺，關柳易折，羈寄之情長，感慨之興短，唯殺之音多，藻績之詞少也。瘦銅舍人負沈宋之才，淳常楊之職，紫荷奉臺，紅藥當階，曉趨丹屏，夕拜青瑣，直鸞闈而端牘，對雞樹而流唱，固嘗倚馬七紙，握蛇百篇，人誦穆如之風，世傳蔚爾之文矣。熱河者，神明界局，地貳陪京，里其道路，旣遠百郡之外，奠其邑居，仍當五都之勝，國家陋甘泉於漢氏，侈仁壽於隋年，以爲堯皇游豫，必作宮於成陽，周王考卜，亦朝步於豐水，每中郢履節，清明告風，乃瞻北顧，此焉

清暑時則舍人滿歲灌謁。往覲爰閭。攷旦首塗。兼辰戒道。房雲在空。箕風動衣。天日姓晏。宇宙黼朗。仰矚宸居之麗。俯察區陬之廓。得不揄揚舞詠。祇和煙墨者乎。若乃層巘隱天。長波帶地。黃靈訪道之山。翠嶠沈玉之渚。舍人極覽津委。旁綜載牒。徵鮑邛之湮流。問濡水之故瀆。博望之槎萬里。探析崐源。太沖之賦三都。參稽方志。是則縹囊一詠。卽注桑欽之經。墨林五言。可備闕駟之記。且夫捎雲之簪。半柯自奇。衝霜之松。寸莖斯見。讀是編者。其可以知舍人之詩也已。